



Sabtu, 01 April 2023

Ogen : Hosea 11:1-4



Ku Pedeher Ia Ku PipingKu



Tupung anak kitik denga meriah kal akap orangtua ngidah tawa dengen perlasakna. Keriahen e nambahi gedang umur orangtua. Mulih orangtua e i bas ingan erdahin nari entah ingan si deban nari, minter idaramina anak-anakna, sabap anak e erbahanca nangtang singalah-ngalah. Tupung kitik anak e ingkip-angkip, iembah-embah dengen iemai pe. Bas perkadena pe ngena kal ate. Iajari ka pe ia alu erbage pengajaren; ngerana, tedis, erdalan, kiam ras sidebanna. Tupung guling ia minter me iangkat, tupung man isulangi.

Bagenda ka me perkeleng ate Dibata man bangsa Israel. Tupung danak-danak denga ngena kal ate Dibata. Iandingken me Israel enda bagi sekalak anak dilaki. Semalna i bas kalak Israel e anak si ipehaga sabap ia me si nerusken sinursur keluarga. Dibata ndilo Israel bas Mesir nari bagi anakNa si dilaki. Kekelengen Dibata e teridah arah: ngajari bangsa Israel bas perdalanan, iangkip-angkip tupung bas kiniseran, iarak-arak, itegu-tegu salu keleng ate ras lias ateNa, tungkuk Dibata e nulangisa, ipedeher ku pipiNa ras sidebanna. Enda kerina nuriken bagesna, ganjangna ras belangna keleng ate Dibata. Dibata rusaha segelah bangsa Israel e banci tetap ndeher ras IA janah ngejapken keleng ateNa e.

Bagi keleng ate orang tua nandangi anakna bage me pengkelengi Dibata man banta. KelengateNa la ersibar, mabai kita reh deherna ras IA. Gejapkenlah Dibata e ngangkip dengen pederher kita ku pipiNa (iemaNa). Genduari selaku anak kai dage sibahan man baNa? Tupung IA erlebuh, aloilah, tupung idudurken tanNa; tangkaplah, tupung iampuNa kita; tenenglah, seh maka la lit dalam sirang kita ras IA.